



STINAPA TA INFORMA

MILAGER NATURAL

Esaki sí ta un gran logro: Parke Marino Boneiru a ser eligí dor di e prestigioso revista New York Times komo un di e 'Shete Milagernan Natural di Karibe'. Segun e rapòrt di hurado, kasi tur isla den Karibe tin koral pero Boneiru tin esnan mas bunita i mihó protehá. Pa wak e lista kompletu por subi riba Internèt na "About.com" i wak na "About Caribbean for Visitors". Ta kalkulá ku 21 mion hende lo lesa esaki. Opiamente niun kampaña di merkadeo por logra esaki. Turismo ta e fuente mas importante di entrada pa tur isla den Karibe. Pero ku tantu isla ta di komprondé ku nan ta kompetí fuertemente ku otro pa haña e turistanan. Islanan ku playanan ku santu blanku manera pèrta, lògikamente tin mas chèns di atraé mas tantu turista. Eseinan ta resultá komo e islanan den Karibe ku turismo di masa. Hotèlnan ku hopi piso, tráfiko drùk, hopi imigrante den konstrukshon i den 'horeca'. Kompará ku e islanan ei, Boneiru ta un oásis di trankilidat. E mayoria di turista ku ta bin bishitá Boneiru ta hasi esaki pa su naturalesa, no pa playanan ku santu i pal'i koko. Nan ta bin pa e lokual ta distinguí Boneiru for di otro islanan; e trankilidat, e bida fasinante riba tera i bou di awa. I lugánan úniko manera Lac, Sorobon i Parke Nashonal Washington Slagbaai. Ta tiki isla tin den Karibe manera Boneiru ku su atmósfera pintoresko i relahá. Pa e ekonomia di Boneiru ta di importansha primordial Boneiru mantené su posishon haltu riba e lista di destinashonnan di sambuyadónan. Segun e agrupashon Coral Reef Alliance ku a duna un presentashon na Boneiru tokante turismo duradero, ta asina ku den Karibe dos tersera parti di e refnan ta bou di menasa di parti di industria di peska, malesanan i sushi ku ta resultá den laman. E region di Karibe mester protehá su refnan di koral bon pa prevení ku sambuyadónan ta kuminsá bai mas den region di Oséano Pasífiko. Ayanan e refnan tin ménos preshon dor di turismo, peska i polushon. Coral Reef Alliance ta usa Boneiru i e trabou di STINAPA komo ehèmpel den henter mundu ora ta trata di protekshon di laman. Tabata bon ku ya kaba na 1979 a deklará laman rondó di Boneiru i Klein Bonaire komo santuario, e promé Parke Marino di mundu. Dor di e maneho progresivo aki Boneiru na aña 2007 ta pará den e lista di e shete milagernan natural di área Karibe. E gran tarea awor ta pa mantené e reputashon aki. Nos mester, pasobra naturalesa ta e salbabida riba kua Boneiru ta drif. *Skirbí pa Trix van Bennekom, tradusí pa Marcel Nahr.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESAS



Traha huntu na un desaroyo duradero pa Boneiru